

জেএসসিতে পাসে সেরা বরিশাল জিপিএ ৫-এ ঢাকা

■ সমকাল প্রতিবেদক

অষ্টম শ্রেণির জুনিয়র স্কুল সার্টিফিকেট (জেএসসি) পরীক্ষায় সাধারণ আট বোর্ডের মধ্যে পাসের হারের দিক থেকে এবার সবচেয়ে এগিয়ে বরিশাল। অন্যদিকে, জিপিএ ৫ পাওয়ার দিক থেকে বরাবরের মতোই শীর্ষে ঢাকা বোর্ড।

গতকাল শনিবার সচিবালয়ে সংবাদ সম্মেলনে শিক্ষামন্ত্রী নুরুল ইসলাম নাহিদ জেএসসি-জেডিসি পরীক্ষার ফলের বিস্তারিত তথ্য তুলে ধরেন। এবার জেএসসিতে পাসের হার ৮৩ দশমিক ১০ শতাংশ। আর জিপিএ ৫ পেয়েছে মোট এক লাখ ৮৪ হাজার ৩৯৭ জন।

আট বোর্ডের মধ্যে জেএসসিতে পাসে সেরা বরিশাল। এই বোর্ডে পাসের হার ৯৬ দশমিক ৩২ শতাংশ। গত বছরের শীর্ষে থাকা রাজশাহী বোর্ড ৯৫ দশমিক ৫৪ শতাংশ পাসের হার নিয়ে এবার রয়েছে দ্বিতীয় অবস্থানে।

অন্যদিকে, গত বছরের মতো এবারও ■ পৃষ্ঠা ১৫ : কলাম ৩

জেএসসিতে পাসে

[তৃতীয় পৃষ্ঠার পর]

পাসের হারে সবার নিচে অবস্থান করছে কুমিল্লা বোর্ড। এ বোর্ডে পাসের হার ৬২ দশমিক ৮৩ শতাংশ।

এ ছাড়া ঢাকায় পাসের হার ৮১ দশমিক ৬৬, চট্টগ্রামে ৮১ দশমিক ১৭, যশোরে ৮৩ দশমিক ৪২, সিলেটে ৮৯ দশমিক ৪১ ও দিনাজপুরে ৮৮ দশমিক ৩৮ শতাংশ।

জিপিএ ৫ প্রাপ্তিতে শীর্ষে থাকলেও ঢাকা বোর্ডে এবার গত বছরের তুলনায় জিপিএ ৫ পাওয়া পরীক্ষার্থী কমেছে নয় হাজার ৫০২ জন। এ বোর্ডে এবার জিপিএ ৫ পাওয়া শিক্ষার্থীর সংখ্যা ৭৬ হাজার ৮৪৮ জন।

গত কয়েক বছরের ধারাবাহিকতায় জিপিএ ৫ প্রাপ্তিতে সবার নিচে রয়েছে সিলেট বোর্ড। এ বোর্ডে সাত হাজার ৬২১ জন জিপিএ ৫ পেয়েছে। এ ছাড়া রাজশাহী বোর্ডে ৩৭ হাজার ৬৩৩, কুমিল্লা বোর্ডে আট হাজার ৮৭৫, যশোর বোর্ডে ১৪ হাজার ৬১২, চট্টগ্রাম বোর্ডে ১০ হাজার ৩১৫, বরিশাল বোর্ডে আট হাজার ৪৩১ ও দিনাজপুর বোর্ডে ২০ হাজার ৬২ শিক্ষার্থী জিপিএ ৫ পেয়েছে।